

REGLUR

um eftirgjöf gjalda af fjárfestingarvörum til nota við loðdýrarækt.

I. KAFLI

Innflutningur.

1. gr.

Við tollafgreiðslu á vélum og tækjum sem flutt eru inn vegna stofnframkvæmda við byggingu loðdýrabúa og teljast til varanlegs hluta þeirra skal heimilt að fella niður aðflutningsgjöld, þ. m. t. sérstakt tímabundið vörugjald og tollafgreiðslugjald, og söluskatt. Með loðdýrabúi er átt við hús, búr og girðingar þar sem loðdýr eru höfð í vörslu og ákvæði laga nr. 53/1981 um loðdýrarækt gilda um, sbr. reglugerð nr. 444/1982. Reglur þessar taka ekki til loðkanínuræktar, sbr. reglugerð nr. 393/1984.

Heimild þessi er bundin því skilyrði að vélar þessar eða tæki falli undir tollskránnúmer sem talin eru upp í 1. gr. auglýsingar nr. 8/1981 með síðari breytingum eða um sé að ræða sérhæfðan vélbúnað til loðdýraræktar, þ. e. vélbúnað sem sérstaklega er hannaður til þeirra nota og sem fellur undir önnur tollskránnúmer í 84., 85. og eða 90. kafla laga nr. 120/1976 um tollskrá o. fl. Tæki og búnaður til rannsókna sem fellur undir tollskránnúmer í 1. gr. auglýsingar nr. 87/1985 en ekki auglýsingu nr. 8/1981 skulu þó hljóta tollmeðferð samkvæmt ákvæðum auglýsingar nr. 87/1985 og ber því að greiða af þeim söluskatt.

Með sérhæfðum vélbúnaði til loðdýraræktar er átt við eftirfarandi:

1. Fóður- og drykkjarkerfi og vélar, tæki og hlutar þeim tilheyrandi, eins og fóðurgeymar (síló), kælikerfi, pípuðreifikerfi, viðnámsþræðir, sniglar, færíbönd, skammtarar, vogir, fóðurgerðarvélar, bryningartæki og hlutar til þeirra, einnig fóðurdæluvagnar.
2. Brímamælar, gildrur, aflífunartæki, fláningsvélar og -bekkir.
3. Neyðarráfstöðvar með tilheyrandi búnaði.

Reglur þessar taka ekki til annarra handverkfæra en þeirra sem falla undir auglýsingu nr. 8/1981.

Heimildin skal jafnframt taka til búra, hreiðurkassa og hluta og efnivara í þau, enda séu hlutar þessir og efnivörur sérstaklega gerðar til nota við framleiðslu á loðdýrabúrum og hreiðurkössum.

2. gr.

Af öðrum innfluttum byggingarvörum til mannvirkjagerðar sem ekki falla undir 1.–3. tl. 3. mgr. 1. gr., t. d. dælum, rafmótorum, rafstöðvum, lokum, pípum, rafstrengjum, timbri, sementi, steypustyrktarjárn, plötuefni og öðrum þess háttar byggingarvörum til byggingar loðdýrabús, hvort sem þær eru fluttar inn af byggjendum sjálfum eða fyrir þeirra hönd skal greiða aðflutningsgjöld og söluskatt með venjulegum hætti við tollafgreiðslu en fjármálaráðuneytið mun endurgreiða aðiljum sem reka loðdýrabú gjöld af þessum vörum skv. 5. gr.

3. gr.

Af hvers konar vinnuvélum og -tækjum svo og varahlutum til þeirra sem notaðar verða við hinar verklegu framkvæmdir skal greiða aðflutningsgjöld og söluskatt eins og þau eru á hverjum tíma og gildir sama um hvers konar ökutæki sem loðdýrabú kaupa til framkvæmda og reksturs á þeirra vegum. Ennfremur skal greiða aðflutningsgjöld og söluskatt af hvers konar rekstrar- og viðhaldsvörum, öðrum en varahlutum sem falla undir tollskrárnúmer upptalin í auglýsingu 8/1981 og notaðir eru til viðhalds sérhæfðum vélum og tækjum sem um ræðir í 1. gr.

4. gr.

Niðurfelling gjalda samkvæmt 1. gr. tekur einungis til véla, tækja, vélahluta og varahluta sem notað verður til loðdýraræktar. Tollmeðferð þessi er jafnframt bundin þeim skilyrðum að innflutningur sé allur á nafni viðkomandi loðdýrabús eða innflutningsfyrirtæki lýsi því yfir í aðflutningsskýrslu að viðkomandi vörusending sé öll eða að hluta, sem þá skal sérstaklega útreiknað í aðflutningsskýrslu, ætluð nánar tilgreindu loðdýrabúi. Hvort sem loðdýrabú annast innflutning sjálfst eða innflutningsfyrirtæki fyrir þess hönd skal fyrirsvarmaður loðdýrabúsins lýsa því yfir skriflega að varan sé eingöngu flutt inn til eigin nota við loðdýrarækt.

Undanþága frá greiðslu gjalda samkvæmt reglum þessum verður eigi veitt nema viðkomandi hafi fengið leyfi til stofnunar loðdýrabús.

Við frágang aðflutningsskýrslu skulu niðurfelld gjöld eigi reiknuð en að öðru leyti skal farið eftir ákvæðum laga nr. 120/1976, um tollskrá o. fl., svo og reglum og öðrum fyrir mælum settum þar að lútandi.

Telji tollstjóri ástæðu til, hvort sem er vegna beiðni um niðurfellingu eða endurgreiðslu gjalda, getur hann krafist viðkomandi loðdýrabú um upplýsingar skv. 6. gr. svo og að framvísað sé leyfi til starfrækslu þess, sbr. 5. gr. laga nr. 53/1981 og reglugerða settra samkvæmt þeim.

II. KAFLI

Kaup innanlands.

5. gr.

Við kaup innanlands á vélum og tækjum, sbr. 1. gr., sem annað hvort eru keyptar af birgðum innfluttra tollafgreiddra vara eða hafa verið framleiddar innanlands vegna stofnframkvæmda við byggingu loðdýrabús, skulu gjöld greidd með venjulegum hætti en tollstjórar hver í sínu umdæmi munu sjá um endurgreiðslur gjalda af þeim. Um framkvæmd þessara endurgreiðslna fer að öðru leyti að hætti ákvæða 4.–6. gr. auglýsingar nr. 8/1981. Fjármálaráðuneytið mun hins vegar endurgreiða gjöld af efnivörum sem notaðar hafa verið til byggingar húsa, girðinga, búra og hreiðurkassa, enda hafi gjöld verið greidd af vörum þessum með venjulegum hætti.

6. gr.

Aðiljar sem óska eftir endurgreiðslu gjalda samkvæmt niðurlagi 5. gr. skulu senda fjármálaráðuneytinu skriflegt erindi, þar sem gerð sé grein fyrir stofnun og starfsemi loðdýrabúsins svo og hverjir séu forsvarsmenn þess og hafi heimild til þess að skuldbinda fyrirtækið fjárhagslega.

Erindinu skal fylgja áætlun um byggingarkostnað, samþykkt af stjórn félagsins ef því er að skipta, þar sem fram komi upplýsingar um gerð og stærð loðdýrabúsins og þau mannvirki sem endurgreiðslubeiðnin tekur til, hvenær byggingaframkvæmdir hófust svo og ítarleg

sundurliðun á kostnaði vegna véla- og tækjakaupa og kostnaði vegna byggingar mannvirkja eins og húsa, búra og girðingar og annarra mannvirkja sem notuð eru til loðdýraræktar. Að því er bygginnaframkvæmdir varðar skulu liggja fyrir upplýsingar eða áætlun um skiptingu kostnaðar milli byggingarefnis, vélavinnu og vinnulauna á byggingarstað. Afrit af leyfi landbúnaðarráðuneytisins til stofnunar loðdýrabús skal fylgja. Jafnframt skal lögð fram staðfesting trúnaðarmanns Búnaðarfélags Íslands og yfirdýralæknis um að úttekt hafi farið fram m. a., á húsum, girðingum, búnaði og allri aðstöðu, er veiti heimild til þess að hefja starfrækslu, sbr. 2. mgr. 14. gr. reglugerðar nr. 444/1982. Greinargerð um gerð og stærð húsa, sbr. einnig 5. mgr., fjölda búra og girðingar, skal staðfest af Byggingastofnun landbúnaðarins. Liggi upplýsingar þessar allar fyrir hjá Byggingastofnun landbúnaðarins nægir greinargerð og staðfesting hennar eða byggingarfulltrúa viðkomandi sveitarfélags.

Teljast framlögð gögn fullnægjandi mun fjármálaráðuneytið endurgreiða áætlud uppsöfnuð aðflutningsgjöld, miðað við heimildaða bústærð, þ. m. t. sérstakt tímabundið vörugjald og tollafgreiðslugjald, og söluskatt af neðangreindu sem hér segir:

	Kr.
a. Aðstöðurými	1.200/m ²
b. Hús fyrir dýr:	
1. Úr timbri	430/m ²
2. Úr stáli	510/m ²
c. Girðingar	210/m
d. Upphengjur fyrir búr	270/stk.
e. Hreiðurkassar:	
1. Fyrir refi	200/stk.
2. Fyrir mink, 6 hólfa eining	395/stk.

Fjárhæðir þessar eru grunnfjárhæðir miðaðar við byggingarvísitölu 216,25 stig 1. júní 1985 og skulu breytast í réttu hlutfalli við þá hækkun eða lækkun sem verða kann á henni, sbr. lög nr. 93/1975. Endurgreiðslufjárhæðir skulu reiknaðar út miðað við þá byggingarvísitölu sem í gildi er þegar úttekt loðdýrabús fór fram. Endurgreiðslufjárhæðir vegna loðdýrabúa sem tekin voru út fyrir 1. júní 1985 skulu þó miðaðar við ofangreindar grunnfjárhæðir óbreyttar.

Breytingar á húsum og stækkun sem talist geta til stofnframkvæmda eru endurgreiðsluhæfar. Sömu reglur gilda um þær og fram koma í 1. og 2. mgr. þessarar greinar. Af byggingarefni sem notað hefur verið til slíkra stofnframkvæmda mun ráðuneytið hins vegar endurgreiða söluskatt gegn framvísun á sölunótum er beri greinilega með sér að söluskattur hafi verið greiddur og séu undirritaðar af seljanda um greiðslu en aðflutningsgjöld mun ráðuneytið endurgreiða með 5% af reikningsverði að frádregnum söluskatti enda megi ætla að efnivörur sem notaðar hafi verið til breytinganna beri slík gjöld.

Ekki verða endurgreidd gjöld af skrifstofubyggingum, vélaverkstæðisbyggingum, starfsmannabústöðum, mötuneytishúsnæði eða þess háttar eða búnaði tilheyrandi þessum mannvirkjum. Séu slíkar byggingar sambyggðar dýrahúsum lækkar endurgreiðslan hlutfallslega miðað við byggingarkostnað þeirra.

7. gr.

Loðdýraræktendur sem fengið hafa efni í mannvirki undanþegið gjöldum samkvæmt þessum reglum er óheimilt innan 10 ára talið frá næstu áramótum eftir að starfsemi er hafin að nota þau til annars en loðdýraræktar, nema leyfi fjármálaráðuneytisins komi til. Óski þeir eftir að taka þau til annarra nota eða afhenda eða selja innan þess tíma til nota við rekstur eða starfsemi sem ekki getur notið gjaldfrælsis samkvæmt þessum reglum skulu þeir áður en

önnur starfsemi er hafin eða afhending eða sala fer fram greiða gjöld af vörum sem notið hafa eftirgjafar samkvæmt þessum reglum, miðað við 10% árlega fyrningu að teknu tilliti til breytinga á vísitölu byggingarkostnaðar.

Fjármálaráðuneytið ákveður fjárhæð þeirra gjalda sem þannig skulu innheimt að fengnum tillögum ríkisendurskoðunar.

Stjórn loðdýrabús eða sá aðili sem heimild hefur til að binda fyrirtækið fjárhagslega skal gefa út yfirlýsingu til fjármálaráðueytisins þar sem því sé lýst yfir að allar þær vörur sem gjöld hafa verið eða verði gefin eftir eða endurgreidd af samkvæmt þessum reglum eða ákvörðun fjármálaráðuneytisins fyrir gildistöku hennar verði eingöngu notaðar til loðdýraræktar og verði þær teknar til annarra nota eða afhentar eða seldar öðrum aðilja til nota við rekstur eða starfsemi sem ekki getur notið gjaldfrelsis samkvæmt reglum þessum sé eigandi þess skuldbundinn til að greiða ríkissjóði gjöld af vörunum samkvæmt 1. og 2. mgr. þessarar greinar áður en notkun sé breytt eða afhending eða sala fari fram. Yfirlýsingu þessari skal þinglýst sem kvöð á mannvirkjum á kostnað eigandi loðdýrabúsins.

8. gr.

Aðili sem fær endurgreiðslu samkvæmt reglum þessum skal tilgreina endurgreidd gjöld sérstaklega, annað hvort í ársreikningi sem fylgir skattframtali eða í skýringum með honum, en þar skal greina undir hvaða lið ársreiknings endurgreiðslan er færð svo og fjárhæð hennar. Jafnframt skulu þeir halda reikningum og öðrum gögnum varðandi vörur sem eftirgjafar eða endurgreiðslu njóta samkvæmt reglunum aðgreindum í bókhaldi sínu sem skattyfirvöld og tollyfirvöld skulu jafnan hafa aðgang að telji embættin ástæðu til eftirlits eða rannsóknar á þeim. Komi í ljós við rannsókn á bókhaldi að þeir hafi misnotað ívilnanir sem hafa verið veittar samkvæmt reglum þessum eða rökstuddur grunur er um að um misnotkun hafi verið að ræða geta tollyfirvöld hafnað beiðnum um niðurfellingu eða endurgreiðslu gjalda samkvæmt þeim meðan málið er í athugun.

9. gr.

Röng skýrslugjöf eða framlagning rangra eða villandi gagna og röng upplýsingagjöf látin í té í því skyni að fá ívilnun á tolli eða gjöldum eða misnotkun ívilnunar eða tollfríðinda samkvæmt ákvæðum auglýsingar þessarar getur m. a. varðað við 63. og 67. gr. laga nr. 59/28. maí 1969 um tollheimtu og tolleftirlit með áorðnum breytingum.

Um meðferð mála vegna brots á reglum þessum fer að hætti opinberra mála.

10. gr.

Reglur þessar eru settar samkvæmt heimild í lið 3.11 og 3.27 í 6. gr. fjárlaga nr. 121/1985 til að öðlast þegar gildi og taka eftir því sem við á til framkvæmda á árinu 1985.

Fjármálaráðuneytið, 7. febrúar 1986.

Þorsteinn Pálsson.

Sigurgeir A. Jónsson.